

DE

7

# SALE AMMONIACO

LIVSDEMQUE VSV MEDICO  
CHYMICO AC CVRIOSO

QVAM

*PRAESIDE*

MARTINO GOTTHELFF  
LOESCHERO

VS. PROF. PVBL. ORD. MED. EXTRAORD.  
VSDEMQUE FACULT. ASSESS. NEC NON SEREN. DVC.  
SAXO-VINAR. PHYS. PROVINC.

## PRO LICENTIA

SVMMOS IN MEDICINA HONORES  
LEGITIME CONSEQVENDI

P. P.

OLFFGANG IACOBVS FELS

CAMPIDONENSIS

AD DIEM IANVAR. A. C. MDCCXXVI.  
IN AVDITORIO MAIORI  
HORIS ANTE ET POST MERIDIEM CONSUVETIS.

VITEMBERGAE LITERIS SCHROEDERIANIS



Digitized by the Internet Archive  
in 2019 with funding from  
Wellcome Library

<https://archive.org/details/b30776119>





DISSERTATIO  
SOLENNIS  
DE  
**SALE AMMONIACO**  
EIVSDEMQUE VSV MEDICO, CHYMICO  
AC CVRIOSIO.

---

I.



raculum Iouis Ammonis, cuius fama totum fere terrarum orbem peragravit, adhuc in Arte salutari celebre est propter duo remedia, quae quondam in Lybia, huius Oraculi patria, circa illud reperiiebantur, atque nomen exinde acceperunt. Alterum est Sal ammoniacum, alterum uero Gummi am-

A 2 mo-



moniacum. Posterius succus est gummosus, destillans ex arbore ferulacea in Africa, iuxta Ammonis oraculum, secundum DIOSCORIDEM; prius uero, si PLINIO credimus, ibidem sub arenis in laminas concretum reperitur. Tacemus lapidem figuratum, quem Cornu ammonis, appellant, a figura Idoli Iouis Ammonis, cuius caput in eodem Oraculo cornubus ornauerant Ethnici; quoniam potius de Sale ammoniaco quaedam disputare Speciminis loco, apud animum constituimus in sequentibus Thesisibus, quae omnia ut B. L. benigne accipiat, et aequibonique consulat, enixe ab eodem rogamus atque contendimus.

## II.

Operae uero pretium fore arbitramur ante omnia, Salis huius uarias afferre denominationes, quae de eius solo natali, natura ac constitutione, aliquo modo nos possunt reddere certiores. Vocabatur itaque a ueteribus Ammoniacum a Iouis ammonis oraculo, uel uti alii referente IOH. CONRAD. BARCHVSEN *Chymia* sentiunt a graeca uoce ἀμμος, arena, et Harenarium, quia inter harenas foderetur in Africa iuxta ANDREAM CAE-



SALPINVM, *de Metallis*, qui existimat, quod a uulgo quoque Armeniacum et Armoniacum appelletur. Nonnullis, asserente FRIDERICO HOFFMANNO *Clauæ Pharmaceutica Schroederiana*, Sal mirabile, Aquila, clauis metallorum etc. audit, nec non Aquila coelestis, Sal Solare, Alba mercurialis fuligo, Sal Mercuriale Philosophorum, Lapis Adir, Audix, Anacab, Alacab, Aliocab, Allocaph, Alcob, Alfol, Alfatide, Alinziadir, Alistiles, Alumonodig, Amizadir, Anoxadic, Azanec, Butrum, Hifazium, Lixandram, Misadis, Nestudar, Nufiadal, Nyfae, Obac, Raal, Salmiax, etc. ab Auctoribus Chymicis nominatur. uid. IOHANNES SCHROEDERVS *Pharmacopœia Medico Chymica*, atque MATTHIAS VNTZERS *de Sale*.

## III.

Atque hoc ipsum Sal plerumque distinguitur in natium et factitium; natiumque, uti ex diligenti scriptorum Chymicorum euolutione facile apparet, iterum est uel antiquum uel hodiernum. De antiquo DIOSCORIDES *Libro V. de Materia Medica Cap. LXXX.* sequentia posteritati reliquit: *In toto Salis genere efficacissimus fossilis est, communiterque in hoc qui candidus,*



*duſ, pellucidus, denſus, concretione ſua aequalis, nec lapidoſus eſt. Priuatim uero genere ammoniacus, barenarius, ſciſſilis, uenis per longitudinem re-ctis. Haec ultima uerba a MARCELLO VERGILIO Secretario Florentino, in antiquiſſima Colo-nienſi Editione, quam Dn. Praeſes poſſidet, ex graeco idiomate in latinum ſermonem transla-ta, IOHANNES CONRADVS BARCHVSEN l. c. p. 417. ita exprimit, ipſaque Cap. LXXXV. reperiri exiſtimat: Peculiariter Ammoniacus natione lau-datur, ſi modo findi facile poſſit et in recta ſeg-menta deduci. AVICENNA Lib. II. Tract. II. Cap. 526. noſtrum Sal ita deſcribit: Sal ammoniacus ille eſt melior, qui eſt ut borrax clarus, chryſtallinus. Calidus eſt ſiccus, ſubtiliatiuus, liquefactiuus, con-fert albugini oculi. Addimus et PLINIVM, qui de eodem Sale ſequentia memoriae prodidit: Hiſt. Nat. Lib. XXXI. Cap. VII Sal ſqualentibus locis coe-ptus inuenitur detractis barenis, qualiter et per Africae ſitientia, uſque ad Hammonis Oraculum. Is quidem creſcens cum Lunae noctibus. Nam Cyre-naici tractus nobilitantur Hammoniaco, et ipſo, quia ſub barenis inuenitur, appellato. Similis eſt colore alumini, quod Schiſton uocant, longis glebis neque perlucidis, ingratus ſapore, ſed medicinae  
utilis,*



*utilis, probatur quam maxime perspicuus, rectis scis-*  
*suris.* Tale erat Sal, quod etiam ueteres qui-  
dam dicebant ex urina Camelorum fuisse exor-  
tum, contra quos grauiter pronuntiat IO. CONR.  
BARCHVSEN *l. c. Fictas et commentitias fabulas*  
*proferunt, inquit, qui literis prodiderunt, istiusmo-*  
*di Sal ab urina Camelorum, quibus peregrinatores,*  
*qui quondam Templum Hammonis frequentabant,*  
*usi sunt, ortum duxisse. Incredibile enim est, tam*  
*magnum tractum, a Cyrene usque ad Garamantas,*  
*potuisse Camelorum urina adeo irrigari, ut ex hac*  
*a sole exsiccata, Sal quoddam fieret.* Hoc tamen  
non obstante, tale Sal ex Urina Camelorum in  
Lybia fuisse productum adhuc inter recentio-  
res asserit PETRVS POMET *Histoires des drogues.*  
Hunc uero non immerito confutat MICHAEL  
BERNHARD. VALENTINI *Musaeo Musaeorum.* At-  
que huc procul dubio spectat effatum PAVLI  
HERMANNI *Cynosura Materiae Med.* Omne  
Sal ammoniacum esse factitium, ipsosque Ara-  
bes ridere dari natium. In totum enim tale  
Sal ueterum negare non possumus, quoniam il-  
lud quondam extitisse ex hactenus adductis  
antiquis scriptoribus fatis abundeque fuit com-  
probatum. Exinde tamen non sequitur, illud  
tan-



tantummodo fuisse productum Vrinae Camelorum circa Oraculum Iouis Ammonis. Eandem sententiam fouet AMATVS LVSITANVS *Enarrationibus in Dioscoridis Libros V. de Materia Medica p. 500.* Venetiis editis, ubi sequentia leguntur uerba : *Est praeterea Sal ammoniacus, qui ex Cyrenaica regione, ubi Hammonis Oraculum olim erat, aduehebatur : nascitur enim ibidem sub arenis, Luna illi multum fauente, quo uero hodie caremus, et illius uice adulteratum turbinatis quibusdam massis exterius nigris ad nos afferunt. Corrupte enim pharmacopolae ammoniacum salem pronuntiant, quum Hammoniacum ob Hammonis oraculum, unde uebitur, appellari debeat. Falsum quoque est, quod illorum multi dictitant, ex urina Camelina salem istum ammoniacum parari, ut ex Plinio unusquisque diiudicare poterit.*

#### IV.

Hac uero de re ut eo minus dubitare queamus, docet Sal ammoniacum hodiernum natuum, quod multis in locis reperitur, atque possibilitatem existentiae antiquioris sua praesentia arguit, quoniam in omnibus cum antiquo conuenit. Opus itaque est, ut ea, quae in praesentia



senti asseruimus, etiam confirmemus. Prouocamus itaque ad Sal ammoniacum natiuum, quod circa Montes Igniuomos reperitur, cuius portiunculam in monte Vesuuio collectam in suis Mineris possidet DN. PRAESES. Tale Sal ad aliquod centumpondia in Monte Vesuuio colligi, et in alias regiones transferri, ex quodam Itinerario, cuius Autorem non addit, refert Io. CONRAD. BARCHVSEN l.c. Idem non Vesuuium tantummodo, uerum etiam Aetnam ferre Sal ammoniacum asserit, uerba enim eius sequentem fluunt in modum: *Nobilem Bocconem idoneum et grauem testem produco, qui in observationibus Physicis Epistola VII. ad Abbatem Bourdelot scripta de incendio Montis Aetnae haec literis tradidit: Extincto igne, in superficie materiae huius ferrugineae, apparebat Sal ammoniacum in magnacopia. Ipsum Sal colore aliquando flauo et croceo, aliquando citrino, aliquando albissimo erat praeditum, ita ut firmiter nobis persuadeamus, quod dicta materia in largissima quantitate Sal ammoniacum emisserit. Insuper saepius ab Amicis accepi Sal ammoniacum crassitie unciarum duarum, magis fixum quam uulgare, et in superficie colore uel uiridescente ac cinereo, uel uitriolaceo ornatum.*

B

Nullus



*Nullus dubito, quin Sal ammoniacum et in aliis regionibus, ubi Montes ardentes dantur, inueniatur. Simile uero Sal etiam in Persia in montibus ignem non euomentibus inueniri, testantur MEMOIRES DEL' ACADEMIE ROYALE a Paris, ANNO MDCCXX. p. 255. ubi DN. GEOFFROY le Cadet de ipso sequentia refert, ex lingua gallica in latinam a nobis translata: Equidem uerosimile non uidetur, quod quidam uiderint Sal ammoniacum uerum ac natium, ex fabulo Lybiae absque alia praeparatione prognatum. Alias hac de re nihil certi constat, quam quod originem suam in regionibus Orientalibus habeat, et Autores ad unum omnes tantummodo de tribus locis mentionem faciunt, ex quibus illatum fuerit illud Sal, quod ammoniacum appellatur. Vidimus antiquiores illud accepisse ex Lybia. Ex recentioribus Tauernier asserit, mercatores Sal ammoniacum et Borracem Surata Emporio Indico Magni Mogolis, quod Annadabat nominatur, apportare, sed de natura et conditione huius Salis ammoniaci nihil addit. DN. Delisle mihi communicauit obseruationem peregrinatoris cuiusdam, qui refert, quod in Metallifodinis montis Tauri in Persia Orientali inueniatur*



tur Sal, quod ammoniacum appellant. Formatur e vaporibus salinis ex fissuris montium exhalantibus, qui lateribus et integumento domicilii cuiusdam, ad colligendum hoc Sal extructi adhaerent. Videtur magnam habere similitudinem cum isto Sale, quod in monte Vesuvio colligitur eodem modo atque eodem quoque loco, ex quo vapores subterranei prodeunt; Itali illud ipsum nomine ammoniaco appellarunt, licet experientia doceat, illud potius esse flores Salis Marini igne subterraneo sublimatos.

## V.

Atque haec sunt potiora, quae de Sale ammoniaco naturali antiquo aequae ac hodierno ex autoribus fide dignis constant. Quale uero sit illud, quo in Medicina utimur, et quod a Mercatoribus ut plurimum ex regionibus Orientalibus ad nos aduehitur et diuenditur, adhuc hodie adeo exploratum non habemus, ut nullus dubitandi locus relinquatur. Melior tamen ac uerosimilior uidetur illorum opinio, qui illud pro artefacto et chymice praeparato habent, licet ex qua materia fiat, et quo modo elaboretur, adhuc sub iudice lis sit. Videbi-



mus itaque et de eo celeberrimorum Chymicorum sententias ea quafieri poterit perspicuitate ac breuitate. ANDREAS CAESALPINVS l. c. p. 51. Processum praeparandi Sal ammoniacum ita proponit: *Sal ammoniacus fit ex quinque partibus urinae humanae, et parte una Salis communis, et parte dimidia fuliginis lignorum, his simul coctis usque ad consumptionem humiditatis, reliquum sublimatur in Salem Armoniacum, hunc iterum in sudore dissoluunt et congelant, et a Sale communi sublimant.* Apud MATTHIAM UNTZERVM *Opere Medico Chymico p. 94. triplicem modum conficiendi Sal ammoniacum relatum legimus: Primo in promptu tibi sit, ait, sufficiens quantitas Urinae hominis uinum bibentis, immitte illi calcem uiuam, probeque haec duo inuicem agita. Postea in hoc lixiuio antea bene percolato, dissolve Salis communis fusi et tenuissime triti quantum uis. Posita in abeno humiditatem ad lentum ignem, sensim euaporare finito, usque ad pultis quasi consistentiam. Adfunde rursus prius lixiuium, et tamdiu illud coque, donec materia sicca remaneat. Quae lixiui reaffusio, et tertio repetenda. Quando autem ebullierit ad dimidiaae partis consumptionem,*

*nem,*



nem, tunc indatur cucurbita cum Alembico super imposito, et humiditas omnis per destillationem abstractatur, abstractus liquor denuo adfundatur, et destillatione ad siccitatem usque extrahatur. Qui labor et tertio reiterandus. Et sic tandem in fundo Cucurbitae tibi restabit Sal quidam, albi subcinerei coloris, qui Ammoniacus dicitur. Alii eundem in hunc modum per Magisterium solutionis, coagulationis et commixtionis parant; Recipe Urinae puerilis libras decem, adde Salis communis partem dimidiam, Misce ad ignem, in olla, et solue. Adice fuliginem, effunde in uas, et sine coagulare. Coagulatum transfer in ollam operculatam cum foramine in summo, bene obsigna luto, colloca in fornacem et coque: ubi uideris exire fumum album, foramen claude, et ignem intende per duas horas. Refrigeratum tandem exime. Antuerpiae ut accepimus, ita hodie componi solet. Accipe Salis communis optime torrefacti libras decem. Superfundantur Urinae prius optime filtratae et per destillationem abstractae librae totidem, adiciendo simul fuliginis Camini, manipulos duos. Lixiuum hoc tamdiu coquatur, donec pultis consistentiam adquirat. Materiae huic denuo libras decem Urinae adfunde, namque per ebullitionem euaporare sine, idque ad-



*buc reiterandum, donec 40. Librae urinae adsumtae fuerint. Facta et peracta ultima coctione tandem materia pultis consistentiam nacta, coniciatur catino superius lato, inferius acuminato et angusto, insuperque uitreato, et ad lentum carbonum ignem residuam humiditatem perfecte evaporare finito, sicque Salem Ammoniacum optimum habebis. Iuxta FRIDERICVM HOFFMANNVM l. c. p. 349. Sal ammoniacum factitium sequenti paratur modo: Hoc Sal ammoniacum, inquit, componitur ex quintuplo crudae Urinae humanae ex sanis desumtae, una parte Salis communis, et dimidia parte fuliginis, haec tria in massam prius coctione rediguntur, et tandem sublimantur. Venetiis in copia conficitur, et Antuerpiae, ex quibus prius Venetianum posteriori Antuerpiano anteponitur. Hic non desunt, qui statuunt ad illud Venetianum sumi ex publico Urinae transitorio tam sanorum quam aegrorum, Leprosorum scil. elephantisiorum, gallicorum, febricitantium etc. Urinam. Verum fallunt hi et falluntur; Nam ad hoc non nisi a sanis collecta Urina eligitur, et cum reliquis ingredientibus coctione in unam coagmentatur massam et postmodum sublimatur, quomodo igitur Urina putrida, ut communis aëri diu exposi-*



*posita solet, cum reliquis incoqui posset, quia statim suo sale uolatili priuatur, secus atque cum Vrina recenti fit.* Nolumus aliorum Chymicorum et ueterum et recentiorum rationes elaborandi Sal ammonicum breuitatis studiosi cumulare, quia cum hactenus allatis in omnibus fere conueniunt. Nam tria potissimum Salis huius artificialis sunt ingredientia, Vrina, Sal commune et Fuligo. Absque uero fuligine etiam istud elaborauit ACADEMIA REGIA SCIENTIARVM PARISIENSIS ANNO MDCCXX. accepit quippe Vrinam humanam, eandemque coctione et euaporatione, redegit in massam, cuius substantia habebat consistentiam Mellis, ex qua cum arena permista formauit placentam, eandemque in Cucurbita igne aucto tractauit, uiditque in collo uasis destillatorii adhaerere optimum Sal instar ammoniaci conspicuum, omnibusque eiusdem requisitis praeditum, quod multis Experimentis ibidem comprobatur. Sed oritur noua difficultas circa Salis ammoniaci artificialis praeparationem, qua scilicet operatione chymica eadem administretur. In hac causa maxime in duas partes abeunt Chymici, quorum alii, illud solutione, euaporatione et crystal-



crySTALLIFICATIONE fieri contendunt, alii uero illud ipsum potius pro sublimato agnoscunt. Mota est lis non ita pridem etiam hac de re in Gallia inter DN. LEMERY et DN. GEOFFROY, prior enim dicebat, Sal ammoniacum in Oriente elaborari iisdem sumtibus laboribusque, atque apud nos Sal commune et culinare ex fontibus salinis excoquitur, ex materia quadam et minera Salina, cuius lixiuium euaporatione in cryсталlos redigeretur: posterior uero contrarium defendit, asseritque, Sal ammoniacum uulgare potius esse productum sublimationis, atque uestigia uasis sublimatorii manifesto prae se ferre. Atque hic etiam Palmam tulit, nam antea laudata Academia Scientiarum Regia literas accepit ex Ægypto a DN. LEMERE Protectore Emporii Cairensis Mense Iunii, Anno M DCC XIX. ibidem exaratas, in quibus etiam tota operatio sublimationis aperitur et describitur. Quoniam haec Epistola quantum nobis equidem constat hactenus latinitatem nondum uidit, L. B. non prorsus ingratum forsitan fore existimamus, ex eadem potiora huc spectantia de modo praeparandi in Ægypto Sal ammoniacum



niacum in praesenti afferre. Materia Salis ammoniaci, loquitur Epistola Gallico Idiomate scripta, est fuligo purissima derasa ex furnis, in quibus fumus ex fimo animantium combusto colligitur. Existunt in Aegypto praeter alia prope urbem Mensoura in Provincia Delta XXV. magna Laboratoria, in quibus singulis annis ad duo millia centumpondiorum maiorum huius Salis conficiuntur. Ipsum uero Salammoniacum in furnis ad hoc negotium accommodatis elaboratur, quorum pars superior multis locis iuxta longitudinem fissa conspicitur, supra has fissuras reponunt uiginti uel triginta uasa globosa, quorum diameter ad latitudinem pedis unius et dimidia accedit, colloque gaudent longitudine pedis dimidia; haec uasa rite clauduntur, atque fuligine cum parca quantitate Muriae et urinae animalium permista adimplentur; postea omnia terra crassa et lateribus teguntur, ita tamen ut colla emineant. Quo facto datur ignis per tres dies atque noctes, et phlegma ex uasis dicta materia repletis exhalat, Saliaque acida pariter ac alcalia in se inuicem coeuntia, circa collum figura rotunda et

C

colo-



colore albicante cohaerent, massamque quandam per sublimationem coagmentatam constituunt. Operatione tandem absoluta, uasa dirumpuntur, massa eximitur et Sal Ammoniacum appellatur.

## VI.

Ex his itaque hactenus adductis apparere existimamus, Sal ammoniacum quod dicitur, aliud fuisse antiquioribus notum, aliud hodiernum, utrumque natium; aliud uero factitium, uulgare in Chymia et Arte salutari usitatum. Id quod quidem uidetur esse de genere Salium enixorum siue mixtorum, quae et de alcalico et acido participant. Nam alcalicam partem accepit ammoniacum ab ipsa Vrina animantium, acidam uero a muria uel Sale communi spiritum acidum destillatione praebente, et si illud fuligo ingreditur, quemadmodum quidem communis fert opinio, etiam resinofum, oleosum, sulphureum ac inflammabile aliquid possidet, et quodammodo accedit ad natium illud, quod circa montes ardentes reperitur. Atque exinde Sal ammoniacum, uolatile ope destillationis redditum, et in forma humida siue spiritu et Sale uolatili oleoso, et ficca, magnam oleorum aethe-



thereorum copiam ob homogeneitatem recipit, secus ac Spiritus Cornu cerui, Tartari urinosus Eboris, Sanguinis humani aliique lixiuiosi. Magnam uero portionem Salis uolatilis continere Sal ammoniacum, imo dimidiam eius partem esse uolatilem egregie confirmat sequens experimentum. Salis ammoniaci puluerisati unciis octo, totidem Salis Tartari adde, misce haec Salia coniuncta optime, et in aqua pluuiali dissolue, destilla hoc lixiuium lento igne beneficio cucurbitae imposito alembico, iuncturis probe munitis, remoue spiritum in guttulis prodeuntem, et aucto igne per duas horas continuato, sublimabuntur flores albi salis ammoniaci, quorum pondus facile uncias quatuor aequaebit; uid. LEMERY *Cursus Chymicus* p. 418. Alio modo ex libra una Salis ammoniaci, se libra salis uolatilis conficitur, et uulgo Anglicanum uocatur, si accipimus Salis huius albissimi et optimi libram unam, et eandem quantitatem cinerum clauellatorum in aqua simplici solutorum, istis in cucurbita longiori affundimus mensuram semis Spiritus uini rectificatissimi, et leni ignis gradu destillationem adornamus, ita recipimus Sal uolatile ficcum



et ualde solidum in alembicum ascendens, ibidemque et in uase recipiente cohaerens, atque cum Spiritu uini descendens, uid, HOFFMANNI *Observationes Physico Chymicae Selectiores* p. 233. At enim uero non solum Sal uolatile, sed etiam fixum in larga satis copia possidet Sal ammoniacum, quod experimur, dum caput mortuum a destillatione spiritus Salis ammoniaci residuum, aqua simplici dissoluimus, lenique coctione euaporamus, tunc in fundo subsidet Sal eiusdem fixum, quod digestium Sal appellant Chymici, eiusdemque inuentorem Syluium celebrant.

## VII.

Haec dum ita de nostro Sale disputamus, necesse esse arbitramur, ut eo melius de eiusdem natura et conditione iudicare queamus, paulo accuratius in Salium omnium generalem ac essentialem constitutionem inquirere. Qua occasione equidem non diffitemur, multa de principio Salino a Chymicis esse tradita, quae tamen omnia magis phaenomena quaedam eiusdem accidentalia delineant, neutiquam uero quid Salinum sit corpus naturale aequae ac artificiale, et per artem Chymicam paratum, rite exponere nobis



nobis uidentur. Quando itaque euoluimus auctores Chymicos etiam celeberrimos, atque ex iis discere cupimus, quid sit corpus salinum, ibidem legimus, illud ipsum esse crassum, rigidum, solidum, pungens, incidens, in aqua solubile, in ea tamen non praecipitabile, et in sicco coagulabile, sapidum, odoriferum, putredini resistens, etc. de quibus omnibus facile largimur, quod actiones principii Salini aliquo modo manifestent ac deseribant, num uero exinde nobis possimus conceptum quendam uerum, genuinum ac essentialem de Salibus formare, alii iudicent. Qua propter nobis quidem, hic aliquid adhuc latere, et hactenus nondum explicatum fuisse, forsan non absque fundamento uidetur. Adeoque nostram hac de re opinionem hoc loco afferre non incongruum erit. Atque ut omnem rem clare ac distincte exponamus, opinamur, Salis omnis naturam iuxta ac essentiam in determinata, perpetua ac constanti partium minimarum figuratione, proportionem ac cohaesione esse repositam. Ipsa uero Salia distinguimus in naturalia, quae etiam commode primigenia possunt appellari, et artefacta. Exempla primigeniorum sunt Mu-  
ria



ria et Sal fosfile, Nitrum, Vitriolum atque alumen Rochae; et arte Chymica parantur Sal Tartari, Sacharum, Sal ammoniacum factitium, Borrax, Sal Plantarum aliaque. Priora figuras suorum minimorum oculo armato accuratissime exhibent, et quidem peculiari methodo prius in aqua dissoluta, et rursus crystallifata, quippe in quo Sal commune habet figuram cubicam, superius acuminatam, et cruce quasi diuisam, nitrum forma prismatica saepius duplici, lateribus aequalibus, cum basi triangulari, gaudet, alumen octo lateribus est instructum et angulis, vitriolum uero rhomboideum lateribus parallelis angulisque obliquis se conspicendum praebet. Has etiam figuras quas forsan non immerito originarias uocare poterimus, non tantummodo in sua diuisione in minima, ope solutionis manifestant, uerum etiam in frustulis maioribus obseruant et ostendunt. Talem portionem Salis Polonici fossilis cubicam, cum uestigio lapidis mineralis a quo abscissa est, nec non Nitrum Indicum sexangulare DN. PRAESES in suo Musaeo curioso asseruat, et Curiosis demonstrat. Salia autem artefacta figuram magis possident compositam, nam Sacha-

cha-



charum beneficio Microscopii monticulum ex globulis pellucidis coagmentatum repraesentat, ac Sal ammoniacum iuxta FREINDIVM *Praelectionibus Chymicis* p. 83. arboris ramos eleganter imitatur, ac in nostro Microscopio accuratissimo recentioris inuentionis, ex multis lineis rectis concinne sibi inuicem coniunctis, uti hortulani hortorum ornamenta exteriora (rabatten) construere solent, compositum conspicitur. Accedit, quod Salia primigenia non tantum simpliciter, et sola in aqua dissoluta, figuram suam originariam certam ac determinatam constanter retineant, sed etiam cum aliis itidem naturalibus et primigeniis permista ac crystallisata, eadem ratione sese repraesentent. Eiusmodi enim iucundissimum spectaculum offert sequens observatio. Eligere opus est notabilem quantitatem Nitri et Salis communis, eandemque dissolvere in larga et sufficienti aquae simplicis copia, facta solutione exactissima, euaporatione blanda, quousque pellicula superius compareat, in crystallos abeunt, et in superficie instar crustae particulae Salis communis cubicae apparent, quibus substrati sunt crystallos oblongi prismatici



DE SALE ET MINERALIBUS.  
tici nitri, e fundo uasis euaporatorii quasi propullulantes, quibus iterum intertextae sunt multae particulae quadratae, ita ut haec Salium inferior mistura, aruum frumento ad maturitatem uergente, et floribus cyanos inter spersis ornato eleganter referat. Ex quo experimento elucescit, haec Salia etiam a figura sua originaria non recedere, sed eandem constanter obtinere, licet etiam sibi inuicem in solutione exactissime fuerint permista. Porro quoque Salia naturalia primigenia, peculiare quid ratione suae cohaesionis et proportionis cum menstruo dissolvente obseruant, quo se ab artefactis sensibilibiter distinguunt, quia maiorem Aquae soluentis copiam sibi postulant, et in eadem difficilius resoluuntur quam operatione Chymica praeparata; ut hoc recte comprobemus ac demonstremus, prouocamus ad Sal Tartari, illud in minori aquae purae quantitate dissoluitur ac nitrum, et saepius unica uncia aquae unciam quoque unam Salis Tartari solutione recipit, ad nitri uero dissoluendi partem unam, partes quatuor aquae et plures requiruntur. Haec ipsa etiam particularum salinarum cum menstruo aqueo dissolvente proportio confirmatur



matur sequenti Experimento curiosissimo ostendente, aquam determinatam quandam ac certam falis cuiuscunque quantitatem, et non ultra, in solutione recipere. Dissoluatur tantum Salis communis aut nitri in aqua simplici, quantum haec capere potest, quo facto aliqua Sachari portio lixiuio huic muriatico immittatur, quam itidem dissoluet haec iam Sale communi aut nitro saturata aqua: hinc Aluminis pariter tantum, quantum illa capere potest, adde, tandemque uitriolum. Quae bina posteriora, etsi aqua illa nihil amplius falis aut nitri, ac Sachari absorbere poterat, nihilominus, in hac deliquescent, et quae ne grano quidem Salis communis amplius ferendo aut sustinendo adaequata erat aqua, illa ad alia salium genera suscipienda adhuc apta erit. Hac quidem occasione silentio neutiquam praetereundum est, magnam esse discrepantiam ratione solutionis inter salia ipsaque metalla, non solum ratione liquoris quo in solutione utrorumque utuntur chymici, quod notius est, quam ut mea commemoratione indigeat, sed etiam ratione proportionis corporis dissoluendi, et liquoris dissoluentis. Si enim iuxta enchirisin artis separatoriae, aquae

D

forti



forti in qua unum metallum dissolutum est, alterum immittimus, illud ab eadem non recipitur, nisi alterum ex illa ipsa fuerit praecipitatum. Id quod uero in dissolutione Salium diuerforum in una eademque aquae copia, uti supra obseruauimus, neutiquam contingit, nisi euaporatio accedat, tunc enim separatim secedunt et crySTALLISANTUR. His itaque hactenus de proportionibus partium Salinarum adductis, restat, ut etiam demonstremus, quomodo earum cohaesio essentialis sit comparata, quam obseruationibus quibusdam elegantioribus et rarioribus illustrare et confirmare animus est. Vidimus supra, quod Sal Tartari et in minori aquae quantitate, et promptius dissoluatur quam nitrum; huic obseruationi addimus sequentia experimenta. Sal Ebsoniense Anglicanum artificiale purgans, quod hodie frequentissime assumitur, ab aequali portione aquae citissime diffluit, ita ut libra una medica aquae fluuiatilis, commode duodecim uncias huius salis capiat. Vna uero libra medica aquae, tantum uncias quatuor cum dimidia soluit salis communis. Alia iterum est constitutio et cohaesio aluminis, cuius saltem unciae duae, libra una



una medica dissolui possunt. Ex quo relinquitur Salia Nitri, Salis communis et aluminis, naturalia et primigenia ipsiusque naturae producta, et difficilius dissolui, et maiorem uberio-remque aquae copiam in solutione requirere, adeoque arctius et intricatius sibi inuicem cohaerere. Discimus exinde, qualis menstrui aquei quantitas sit necessaria in operationibus Chymicis, quibus salia quaecunque et naturalia et artefacta, soluere, depurare et praeparare in Chymia annitimur. Possemus nunc ulterius progredi, atque ostendere, quo pacto Salia acidia, alcalia et mixta siue enixa inter se discrepent, ratione suae cohaesionis et inde dependentis solutionis uel citioris uel tardioris, sed reuertimur tanquam ex diuerticulo grato, in quod propter rei hactenus consideratae iucunditatem secesseramus, ad nostrum de quo in praesenti dissertatione agimus, Sal ammoniacum, eius enim utilitas in Medicina et Chymia curiosa, nos ad sui considerationem suo quodam iure inuitat.

## VIII.

Inter alias igitur uirtutes medicas, quibus Sal ammoniacum pollet, eminet eiusdem uis fe-



brifuga, maxime in curatione febrium intermit-  
tentium celebris. Nobilissimum enim antifebri-  
le esse nostrum Sal in febribus intermittentibus,  
si praemissis praemittendis ad uomitum exci-  
tandum ante Paroxysmum exhibeatur, auctor  
est E T T M Ü L L E R V S, qui illud speciatim febres  
Quartanas mitigare asserit, atque ex Sale ammo-  
niaco cum lapidibus cancrorum sociato, pulue-  
rem specificum contra febres tales egregie pro-  
ficuum conficit, de quo experientia edoctus est,  
quod raro bis assumatur ab aegrotantibus, nisi  
febris altas egerit radices, uid. eiusdem *Chymia  
rationalis et Experimentalis Curiosa* p. 9. L E M E-  
R Y accipit Caput mortuum a destillatione spi-  
ritus Salis ammoniaci cum sale tartari facta resi-  
duum, quod Sal ammoniacum fixum appellat,  
et ad febres intermittentes in aqua Centauri  
minoris, uel alia appropriata propinandum, tan-  
quam optimum remedium commendat,  
uid. eiusdem *Cursus Chymicus* p. 419.  
B A R C H V S E N de Salis ammoniaci usu feбри-  
fugo etiam in febre Quartana sequentia  
notatu dignissima l.c.p. 420. memoriae prodidit:  
*Sal ammoniacum, quod iam in usu est, uim habet  
sudorem et Urinam pellendi: soluit quasuis febres  
inter-*



intermittentes; imo et ipsam quartanam. Datur plerumque a 2<sup>o</sup> ad 3<sup>o</sup>. Verum nuper DN. MVYS in dissertatione de Salis ammoniaci ad febres intermittentes praeclaro usu in lucem edita ostendit, id tuto a drachma una ad drachmas sesqui, in aqua dissolutum contra febres bibi: satis esse si semel uel bis ante accessionem bibatur. Laudatissima contra febrem Quartanam haec compositio est: Recipe Chinae chinae 3x. antimonii diaphoretici, oculorum cancri puluerisatorum, salis ammoniaci crudi ana 3jij. M. f. pulvis, cui admisce Roob 3jj. aquae cuiusuis quantum satis est, ad ea mollienda atque cogenda. Diuidantur postea in decem partes aequales, et quaelibet, antequam deuoranda est, prius crustulae panis (oblatae) inuoluatur, ne sapor eius ingratus aegroto fastidium moueat. Ante huius compositionis usum, si natura aegri fert, uomitum, die, qua febris conquieuit, re apta, e. g. Tartaro emetico, inuitamus: die sequente mane et uespere dosin dictae compositionis ad deuorandum damus; altera die mane, et a meridie, et uespere, quando cubitum it, dosin; tertia die etiam tres doses: quarta uero reliquas duas. Hoc testificari non dubito, quod spes, quam in dicta compositione maximam habebam, me nunquam



*buc usque frustrata sit; quanquam saepe saepius ea ad quartanam discutiendam usus fuerim. Nec observare licuit ullum incommodum ex eius usu aegro accidisse.* MVYSII disputatio, quam allegavit BARCHVSEN Anno 1716. prodiit Fra-  
nequerae, in eadem Salis ammoniaci summe proficuum usum in febribus intermittentibus, non tantum propria, sed etiam fratris defuncti observatione et experientia confirmat. Porro multum auxilii ab eodem Sale ammoniaco expectandum esse in febribus intermittentibus, si humores crassi et uiscidi incidenti sunt, sique crusta intestinorum uillosa ab amurca et glutine expedienda est, nec non in uitiis stomachi etiam sua experientia corroborat HOFFMANNVS *Observationibus Physico Chymicis selectioribus* p. 202. Singulare est, quod MEDICI BEROLINENSES in suis *Actis Volumine I. Decade I.* p. 87. circa hunc Salis ammoniaci usum in febribus intermittentibus obseruarunt. Diuersis nimirum alias robustis et ad militiam pertinentibus hominibus, una uel altera hora ante accessum febris Tertianae, drachmas duas salis ammoniaci in aqua appropriata dissoluti propinauerunt.



ac experti sunt reiterato saepius experimen-  
to, statim ac uentericulum tetigit Medicina  
assumta, horrorem febrilem, et quidem citi-  
us ac ante tempus alias consuetum febrici-  
tantes inuasisse, cum subsequente aestus non  
minore exacerbatione. Exinde concludunt,  
Salis ammoniaci uirtutem febrifugam in uir-  
tute infrigidante primas uias, consistere, ean-  
demque maxime esse suspectam asseuerare non  
dubitant. Verum equidem est, Sal ammoni-  
acum si in aqua dissoluitur, eandem reddere  
frigidior, illud enim Thermometra eidem  
immissa optime indicant, num itaque similem  
effectum in Ventriculo et intestinis praestet,  
atque citiorem ac uehementiorem horrorem  
febrilem producat, alii iudicent, experien-  
tia ulteriori edocti. Non autem in feбри-  
bus intermittentibus solum, sed etiam he-  
cticis usus Salis ammoniaci hactenus obti-  
nuit. Conficit enim D<sup>N</sup>. PRAESES cum ali-  
is puluerem Antihecticum ex Lapidibus can-  
crorum, antihectico Poterii, Sale ammonia-  
co depurato, nitro antimoniato coeterisque  
contra Hecticam febrem usitatis, qui officium  
egregie facit. Similiter uirtutem Elixirii  
prae-



praecipitantis cum lixiuio Salis ammoniaci parati, in eadem febris, longinquo usu, comprobata esse nouimus.

## IX.

Cum usu Medico Salis ammoniaci artissimum commercium habet eiusdem usus Chymicus. Eo ipso enim dum multis operationibus Chymicis inferuit, ex eodem uaria elaborantur praeparata Chymica, quae utilitate Medica non carent. Nolumus omnia atque singula hic recensere, quoniam notissima sunt, atque in scriptis Chymicis, etiam istis, quae omnium manibus teruntur, passim sunt obuia. Eminent prae aliis Spiritus Salis ammoniaci uel simplex, uel uinosus, uel oleosus, anisatus, assafratus. Simplex efficacissimus est, si cum calce uiua paratur, et maxime externe usitatus in affectibus soporosis, apoplexia, lipothymia et syncope. Obseruamus quoque eundem et olea aetherea auidissime arripere, et se cum spiritu uini rectificatissimo absque perturbatione coniungere, unde Salia uolatilia extemporanea optima resultant. Spiritum excipiunt flores salis ammoniaci, uel simplices, uel martiales et antimoniati, nec non salia uolatilia



latilia informia sicca, atque uaria salia fixa, quae studio praetermittimus, in promptu enim sunt quaedam Medicamenta Chymica Polychresta, quae sal ammoniacum ingreditur. Notum est, quod Tincturae Martiales uariis menstruis extrahantur e ferro, quorum plurima acidam habent naturam, commemorat uero IOHANNES FREINDIVS *Praelectionibus Chymicis* Oxonii habitis peculiarem quandam ferri Tincturam, ex inuentione Mynsichti ope salis ammoniaci factam, quippe quod ad ferri naturam et uires propius accedere arbitratur. Processus ipse, quem memoratu dignum iudicat, talis est. Accipe Salis ammoniaci partes duas, limaturae chalybis partem unam, misceantur inuicem et destillentur secundum artem per retortam, primum lento, deinde uero fortiori igne, sic Essentia martis remanet in fundo. Hanc exime et optime edulcora, ut ab omni salis ammoniaci acredine sit libera, postea materiam hanc edulcoratam cucurbitae immitte, et cum spiritu uini extrahe Tincturam. Cum desit tinctio Spiritum tinctum exime, et per alembicum abstrahere usque ad medietatem, reliquum per chartam filtra et habebis optimam et ueram martis Tincturam. Desiderat uero multa Chymicus excitatus in hac operatione, primo enim destillationi calcinationem esse substituendam iudicat, qua quippe ferum ab igne uehementiori adhibito magis diffringitur. Deinde etiam edulcorationem huius Massae superuacaneam esse iudicat, quoniam tantum abest ut huic Tincturae aliquid noxii a sale ammoniaco accedat, ut potius exinde eadem efficacior reddatur. Tandem loco abstractionis Tincturae suadet eiusdem

E

dem



dem digestionem diuturniorem, ita compendiosiori  
uia efficacior Tinctura euadet. Elegans non mi-  
nus medicina contra Nephritidem ex Capite mor-  
tuo Spiritus salis ammoniaci cum sale Tartari et cal-  
ce uiua destillati extrahitur, de qua consulatur DA-  
NIEL LVDOVICI *de Volatilitate Salis Tartari*, p.  
35. Veteres ex Sale ammoniaco conficere poterant re-  
media Cosmetica, inter quae etiam Sal ammoniacum  
refert OVIDIVS *de medicamine faciei*, dum ita loquitur:

*Cumque Ammoniaco mascula thura Sale.*

X.

Plura hanc in rem non addimus, sed potius pro-  
peramus ad curiosa quaedam Experimenta, quae ope  
Salis ammoniaci conficiuntur. Primo enim eodem vo-  
latilisationem salium fixorum ostendimus, si illud cum  
sale tartari uel cineribus clauellatis in mortario lapi-  
deo diligenter terimus, eademque exactissime inui-  
cem permiscemus, ita enim sal ammoniacum antea  
odore carens, acutissimum spirat odorem nares sensi-  
biliter ferientem, qui summopere augetur, si hanc  
massam aqua calida dissoluimus. Secundo destillatio-  
nem Spiritus Salis ammoniaci curiosam sine igne an-  
te oculos ponimus, dum salis ammoniaci solutionem  
rite saturatam calci uiuae affundimus in cucurbita ui-  
trea, tunc alembico imposito, strepitus cum ingenti  
ebullitione coctionem imitante excitatur, spiritusque  
salis ammoniaci striatim in alembicum ascendit, et in uas  
recipiens eidem applicatum iucundo satis spectaculo  
destillat. Tertio mirabile est in Sale ammoniaco, quod Ni-  
tro permixtum et igni admotum flammam aliquam  
concipiat, si in aperto tractetur, ex quo aliquo modo  
confici poterit, etiam in hoc Sale aliquid inflamma-  
bilis



bilis latere et resinositatis, id quod forſan ex fuligine quae eiusdem compositionem, ingreditur, accepit, uti ſupra Theſi VI. annotauimus. Sal uero ammoniacum cum nitro flammam quandam ostendere etiam teſtatur, GEORGIUS ERNESTVS STAHLIUS *Fundamentis Chymiae dogmaticae et Experimentalis* p. 66. De reliquo quarto in dealbandis Metallis Sal ammoniacum magnam habet efficiam, et ſpecialim dealbationem auri beneficio eiusdem docet iam laudatus STAHLIUS *l. c.* Si enim eidem adiungatur metallum aliquod, et haec Maſſa per quoddam temporis interuallum digeritur, et cum addito Sale Tartari deſtillatur, accipimus ſpiritum efficaciffimum auro colorem album conciliantem, ſi eiusdem uapori tantummodo imponitur, talem, qualem ab affrictione hydrargyri recipit. Hoc Experimentum itaque inſigne documentum eſt, quid Sal ammoniacum poſſit in diſſoluendis metallis, quoniam mercurium uiuum ex admiſto metallo extraxit, et ope eiusdem auri colorem naturalem in album commutauit. Exhibet ſe mercurius uiuus per praecipitationem in hoc ſpiritu, ſi eidem ſpiritus Salis affunditur. Vtimur etiam quinto Sale ammoniaco et Tartaro, hiſque Salibus argentum in minima redigimus, atque hoc puluere cuprum quoad ſuperficiem externam in argentum permutamus. Egregie quoque inferuit, ſi aurum ab argento ſeparare uolumus, nam ſi Tartarus, Borrax et Sal ammoniacum in aqua diſſoluitur, poculumque argenteum in auratum candefactum in hac ſolutione extinguitur, aurum ab argento ſecedit. Sexto ii, qui in Metallis extrahendis et conficiendis allaborant, norunt, peculiare quid obtinere Sal ammoniacum, ſi Eſ-

ſen-



santias et Tincturas ex Metallis conficere animus est, id quod equidem paucis notum est, nihilo secius tamen ita comparatum, ut Aurum potabile uel Essentias auri concentratas, aliorumque Metallorum, beneficio eiusdem praeparare, decenti simul Enchiresi admota facile queamus. Curiosa non minus est Tinctura cupri extemporanea, dum recipimus rasuram cupri, eidemque affundimus Spiritum Salis ammoniaci rite elaboratum, omniaque recipienti Antliae Pneumaticae includimus, tunc si aërem ex eodem subducimus iterumque admittimus, spiritus salis ammoniaci tingeritur elegantissimo colore saphirino, et uices Tincturae cupri efficacissimae sustinet, ubi quidem aeris uiolentam admissionem et pressionem uelocissimam cupri solutionem producere ac promouere nulli dubitamus. De reliquo quanta sit potentia auri fulminantis, quo etiam quidam in Medicina facienda utuntur, ex Chymia et Physica Experimentalis Curiosa constat, illud uero adhuc mirandum non immerito est, talem fulminationis uirtutem etiam in aliis Metallis existere, id quod ope salis ammoniaci possumus ostendere, atque argentum et ferrum in specie fulminans elaborare. Atque haec Experimenta Curiosa non contemnendam suppeditare nobis uidentur occasionem, in Chymia Curiosa et Experimentalis ulterius meditatione et periculum faciendo progrediendi, multaque noua inueniendi, ex quibus Respublica et literaria plura et euidetiora commoda tandem aliquando percipiet, quam hactenus in eandem redundarunt ex illorum laboribus, qui in lapide Philosophorum elaborando defudarunt, atque operam et oleum perdiderunt.

T A N T V M.